

**АКАФИСТ**  
**ПРЕПОДОБНОМУ АФАНАСИЮ МЛАДШЕМУ,**  
**ИГУМЕНУ ВЫСОЦКОМУ,**  
**СЕРПУХОВСКОМУ ЧУДОТВОРЦУ**

**Кондак 1**

Избранному Богом во игумена обители Высоцкия и дивному в преподобных отцу нашему Афанасию составим похвалу! Той бо, яко отец чадолюбивый, молит за ны прославльшаго его Господа да сохранит обитель сию от нестроений и наветов злых человек и нас всех соблюдет в мире и единомыслии и любви; мы же любовию сыновней к нему преисполнении, со умилением благодарственно зовем дивному угоднику Христову: Радуйся, преподобне отче наш Афанасие, Высоцкий чудотворче.

**Икос 1**

Ангелов Творец и всея твари Создатель, явивый Церкви Святей всесветлаго светильника, от града Ярославля призывай тя, преподобне отче наш Афанасие, в пределы града Серпухова во обитель Пречистыя Девы иже на Высоком приведи тя. Мы же, видя совершение благия воли Господни на тебе, с любовию вопием ти сице: Радуйся, града Ярославля преславное прозябение. Радуйся, пророка древняго Амоса имя получивый при крещении. Радуйся, яко из детска ум и душу твою Господеви предавый. Радуйся, любве ради ко Господу дом отеческий оставивый. Радуйся, во обитель Высоцкую пришедый и тамо покой душе своей обретый: Радуйся, от юности твоя ярем Христов на ся восприявый. Радуйся, богомудрым учителем твоим Афанасием в монашестве делании умудренный. Радуйся, образ иноческаго доброделания чрез все житие твое пронесый. Радуйся, преподобне отче наш Афанасие, Высоцкий чудотворче.

**Кондак 2**

Видев преподобный Афанасий строгия уставы обители Высоцкия возрадовался духом: издетска бо желашу постное иноческое житие на себе восприяти и Богу пети: Аллилуиа.

**Икос 2**

Разуме преподобный учитель твой Афанасий велию ревность твою по Бозе и яко богоугодным житием твоим безсмертие уллучиши духовное, Афанасием ты нарекает — безсмертию тезоименитым содевает. Восхваляюще дивное житие твое, преподобне, приносим ти сия похвальныя словеса: Ра-

дуйся, блаженнаго Афанасия, первого игумена Высоцкаго, любимый учениче. Радуйся, от руки его постриг монашеский приемый. Радуйся, Афанасием им нареченный. Радуйся, руководством его ко спасению вечному направленный. Радуйся, духовнаго отца своего Афанасия благая отрасль и духовдвижная. Радуйся, яко во игумена обители Высоцкой им поставленный. Радуйся, вельми во временней сей жизни подвизавыйся и многих ко спасению приведый. Радуйся, яко и по ныне руководиуещи ны во Отечество Небесное молитвами твоими. Радуйся, преподобне отче наш Афанасие, Высоцкий чудотворче.

### **Кондак 3**

Силою вышняго управляем учитель твой, преподобне отче, со святителем Киприаном Царяграда достиже и тамо престол Патриаршия славы наследова, отгуду бо утешаху тя, подвизая пети: Аллилуиа.

### **Икос 3**

Имея в иночестем житии мудраго наставника блаженнаго Афанасия, преуспевал еси преподобне, в подвизех и трудах, восходя от силы в силу, да совершен иннок явишися и отец братии чадолюбивый. Мы же, воспевая подвиги и труды твоя, взываем ти сице: Радуйся, всех любезно в доброе и спасительное пристанище наставляющий; Радуйся, в монашеское отишие, аки в некоем корабле безопасном, к тебе приходящих водителю. Радуйся, собранное тобою духовное стадо бодренным оком выну назирающий. Радуйся, твоих учеников и наследников непрестанно на путь Божиих заповедей наставляющий. Радуйся, не словом точию, но множае паче делом и усердною к Богу молитвою их поучающий. Радуйся, твоих купножителей монашескими правилами красно и боголепно украшающий. Радуйся, заповедей и велений Божиих усерднейший исполнителю. Радуйся, к чистому и непорочному житию благопоспешный предводителю. Радуйся, преподобне отче наш Афанасие, Высоцкий чудотворче.

### **Кондак 4**

Бурю житейскаго моря воздвигаемую на люди Христовы человекоубийцею искони диаволом научал еси безбедно преходити, глаголя: “сохраняйтесь в малом, да не впадете в великая, блюдите помышления ваша немятежна и Богу пойте присно: Аллилуиа”.

### **Икос 4**

Слышаша ближнии и дальнии богоугодное житие твое, Афанасие отче наш, и к потоку богодухновенных словес твоих во множестве притекаху, с веселием зовуще тебе: Радуйся, отче наш преславный. Радуйся, пастырю наш предобрый. Радуйся, наставниче наш, Богом наученный. Радуйся, добродете-

ли всякия правило. Радуйся, разсуждения даром почтенный. Радуйся, смире-  
нием на высоту вознесенный. Радуйся, благочестивым житием твоим многия  
приведый ко спасению. Радуйся, богоугодными словесы твоими к Небеси  
указывый вернейший путь восхождения. Радуйся, преподобне отче наш Афа-  
насие, Высоцкий чудотворче.

### **Кондак 5**

Боготечное светило, путь жизни твоя озаряющее, бысть тебе учитель  
твой святитель Цареградский Афанасий, из страны бо дальняя со иеромона-  
хом Виктором чудныя иконы и иныя потребныя вещи обители твоей дарст-  
вует, поюще всех благих Подателю Богу: Аллилуиа.

### **Икос 5**

Видеша, преподобне отче наш Афанасие, дивный дар наставника твоего,  
разумеша скорбь его велию о отечествии своем. И моляху о нем Господа, да  
утешит его во стране чуждей суша. Молися и о нас, чадах твоих, во юдоли  
сей плачевней жительствующих и к твоему предстательству прибегающих и  
тако тебе вопиющих: Радуйся, непрестанными молитвами сердце твое освя-  
тивый. Радуйся, мысль твою в Бозе угвердивый. Радуйся, очеса твоя всегда  
на небо возводивый. Радуйся, молитвою твоею отца твоего духовнаго уте-  
шивший. Радуйся, яко от Горних высот и нас, многогрешных, милостиво на-  
зираеши. Радуйся, в бедах и обстояниях помощниче скорый. Радуйся, пред-  
стателю о нас пред Господем непостыдный. Радуйся, к Богородице молит-  
венниче наш неусыпный. Радуйся, преподобне отче наш Афанасие, Высоц-  
кий чудотворче.

### **Кондак 6**

Проповедник богоносный быв, отче наш Афанасие, истинному богове-  
дению и благочестию научал еси братию твою присно, паче же образом жи-  
тия своего наставляя на путь спасения, да вопиют вси Спасителю Богу: Ал-  
лилуиа.

### **Икос 6**

Возсиял еси во обители Высоцкой в дому Пречистыя Девы Богородицы  
в славнем граде Серпухове, преподобне, дивным житием твоим, якоже све-  
тило многосветлое, тьму неведения и уныния от приходящих к тебе отгоняя и  
вся увещаваая плоть духови покоряти и невозвратным помыслом Христу ра-  
ботати. Сего ради приими от нас похвалы сия: Радуйся, милосердием твоим  
на покаяние подвизаяй. Радуйся, никогоже приходящаго к тебе вон изгоняй.  
Радуйся, горесть жития молитвою услаждати и научаяй. Радуйся, во Едином  
Бозе всю сладость жития полагати вразумляй. Радуйся, приятное благоуха-  
ние духовнаго умиления. Радуйся, обитель Высоцкую и град Серпухов мо-

литвою твоею благоухавый. Радуйся, делателю благий, в мале верный, над многим поставленный. Радуйся, в радость Господа твоего вшедый. Радуйся, преподобне отче наш Афанасие, Высоцкий чудо-творче.

### **Кондак 7**

Хотящу Всевышнему Мироправителю призвати праведника своего в Небесныя Скинии по немалых летех во игуменстве пребывша, на кончину изнеможение старческое и скорбь телесе приял еси, преподобне, якоже Иов оный не преставаея благословляти Господа и пети Ему: Аллилуиа.

### **Икос 7**

Ново и необычайно течение совершил еси жития твоего, святче Божий, в мире сем чуждо всякия скверны греховныя, сего бо ради аще и умерл еси на земли плотию, но душею в вышнем селении всегда жив сый, нам же, во святей обители твоей живущим, теплым твоим ходатайством пособствуеши, вопиющим к тебе таковая: Радуйся, Ангелов подобниче и человеков красото. Радуйся, святости и чистоты крине благоуханный. Радуйся, терпением твоим с многострадальным Иовом сравнивыйся. Радуйся, болезнями многими здравие души стяжавый. Радуйся, жителю Божественнаго селения. Радуйся, достигий вечнаго упокоения. Радуйся, всесветлаго Царствия Христова наследниче. Радуйся, Иерусалима Горняго граждане. Радуйся, преподобне отче наш Афанасие, Высоцкий чудотворче.

### **Кондак 8**

Слышавши убо о блаженней кончине твоей, премилостивый, обители твоя братия и многия люди собращая на успение твое; многотрудное тело твое достождно с чинопением честно провождающе, погребоша оное во гробе, надгробное рыдание творяще песнь: Аллилуиа.

### **Икос 8**

Весь сладость и желание тебе, преблаженне, бысть Христос Иисус, егда в житии сем молитву Его не преставаеши еси повторяти; и в преселении твоём от земных в небесная истее причастился, отче, сладости и желаниа в не вечернем дни Царствия Его. О сем введуще и о таком блаженном успении твоём радуящися, сия достойныя тебе приносим глаголы: Радуйся, святче Божий, свято и праведно жизнь земную совершивый. Радуйся, во благоухании святыни сном смертным опочивый. Радуйся, на лоно Авраама Ангелы несенный. Радуйся, пением неземным от святых небожителей встреченный. Радуйся, яко память твоя с похвалами и успение со святыми. Радуйся, яко отверзошася тебе врата райская, и вшел еси в радость Господа твоего. Радуйся, венец бессмертныя жизни от руки Вседержителя приемый. Радуйся, в Черто-

зе Небеснаго Домовладыки ликовствуяй. Радуйся, преподобне отче наш Афанасие, Высоцкий чудотворче.

### **Кондак 9**

Вся братия удивляхуся зело, егда церковных вещей хранитель на тя, преподобне, гневался и не хоте и на погребение мощей твоих итти и сего ради от дручения демонскаго мучим быв, в ров могильный ввержеса и абие исцеление получи, поя его мучения вражия свободившему Богу: Аллилуиа.

### **Икос 9**

Витийствовати язык не довлеет воспевая милость и кротость твою, егда брату гневавшемуся на тя, преблаженне, прощение ниспослаше: уже сый в гробе своем погребен из онаго руку свою протяже, приемше брата твоего рекл еси ему: “вскоре имаши оставити жизнь свою, близ кончина твоя”. И в третий день по глаголу блаженнаго преставися монах той. Сему удивляющеся вопием ти сице: Радуйся, разрушителю вражды и насадителю братолюбия. Радуйся, яко по успении твоем руку мира брату твоему милостиво подавый. Радуйся, сим преславным видением всех удививый. Радуйся, яко и по смерти твоей отец чадолюбивый являешися. Радуйся, щедрот и милования струя неизсякаемая. Радуйся, любве и сострадания явление многочудесное. Радуйся, душевных недугов благосердный целebниче. Радуйся, телесных болезней предивный врачу. Радуйся, преподобне отче наш Афанасие, Высоцкий чудотворче.

### **Кондак 10**

Спасение принесл еси, блаженне, обители твоей и граду Серпухову иногда, егда зловерцы агаряне и польския люди разорити сии устремишася и множество народа плениша и разориша и острием меча побиха. Дивно в видении всем явися, враги устрашая и прогоняя, и вся верныя подвизая пети избавителю Богу: Аллилуиа.

### **Икос 10**

Царя Небеснаго Христа явился еси отче грозный воин, егда на коне белом из обители вышедший виден был еси и в церковь каменну во граде стоящу вшедый, яко дивитися агаряном зело. От церкви же тоя, в руках жезл велик имея един, внезапно зело скоро на врагов оных устремися, грозя жезлом тем. И бежаша вон вся орда, убоявшись видения сего; людие же свободеннии с благодарностию воспеша тебе: Радуйся, грозный карателю обидящих. Радуйся, обители твоя страже неусыпный. Радуйся, жезлом игуменским вся видимыя и невидимыя враги устрашивый. Радуйся, жезл настоятельства во обители твоей до ныне содержай. Радуйся, православному воинству и по преставлении твоем видимым образом споборствуяй. Радуйся, пределы оте-

чества нашего твердым щитом твоего покрова защищай. Радуйся, святые обители твоя присное охранение. Радуйся, града Серпухова необоримое за-  
щищение. Радуйся, преподобне отче наш Афанасие, Высоцкий чудотворче.

### **Кондак 11**

Пение трисвятое слышаху братия не единощи, сладким гласом на гробе твоем воспеваемо, овогда убо кадяща гробы, овогда со свещами горящими обитель обходяща ты видеша. Познаша убо присно обители их попечение возрадовашася и Богу воспеша: Аллилуиа.

### **Икос 11**

Свещи горящая видевшие священнослужители и монахи и ины люди на гробе твоем, преподобне, помышляху преславное чудо быти. Чрез Ангелы бо прославляет Господь святые Своя: возжигают бо тыя свещи церковныя, вокруг престола их обнося и к гробу святого несут и взывают к нему таковая: Радуйся, Небеснаго Сиона жителю. Радуйся, нерукотворенных Скиний райских обитателю. Радуйся, дивный Христов угодниче. Радуйся, Богу присный любимче. Радуйся, со Ангелы присно ликуяй. Радуйся, с Преподобными ублажаемый. Радуйся, яко тобою Вышний на небеси и на земли славится. Радуйся, яко со Ангелы горе трисвятую песнь Ему немолчно поеши. Радуйся, преподобне отче наш Афанасие, Высоцкий чудотворче.

### **Кондак 12**

Благодать великих чудес от Господа приял еси, преподобне отче наш Афанасие, и по достоянию чудотворец наречен был еси: ибо не токмо при жизни, но и по смерти, величием твоих чудес всех удивляеши, и ко славословию Промысла Божия подвигаеши, во еже пети о тебе чудес Творцу Богу: Аллилуиа.

### **Икос 12**

Поюще радостную песнь хвалы и благодарения Человеколюбцу Богу, прославльшему ты во граде Серпухове во обители Высоцкой чудотворца дивнаго и милостиваго, молим ты, отче наш Афанасие: буди ходатай к Нему и молитвенник присный о нас, чадах твоих во обители твоей жительствующих и зовущих ти таковая: Радуйся, Пресвятая Троицы верный служителю Радуйся, Пресвятая Богородицы достойный предстоятелю. Радуйся, несомненною надеждою на Бога обитель твою созидавый. Радуйся, слезами молитвенными основание ея оросивый. Радуйся, обитель твою и по скончании твоем сохранивый. Радуйся, чада твоя духовная и по смерти твоей не забывый. Радуйся, приходящих во обитель твою на поклонение благий предстателю. Радуйся, почитающих святую память твою небесный покровителю. Радуйся, преподобне отче наш Афанасие, Высоцкий чудотворче.

### **Кондак 13**

О, предивный угодниче Христов, преподобне отче наш Афанасие! Малое сие моление прими от нас, недостойных чад твоих, от любви тебе нами приносимое; молися о нас ко Всетворцу Богу, да утвердит нас на тернистом пути монашеского делания и сподобит с тобою вкупе во Обителях Небесных воспевати Ему: Аллилуиа, Аллилуиа, Аллилуиа.

**(Этот кондак читается трижды, затем икос 1 и кондак 1)**